

21. April 2017

Kalaallit Nunaanni aningaasarsiornermut killeqarfimmi imaani avatangiisinik allanngutsaaliuineq pillugu inatsimmut Namminersorlutik Oqartussat tapersiinissaat pillugu Inatsisartut aalajangiiffigisassaattut siunnersuut.

(Namminiilivinnermut, Pinnngortitamut, Avatangiisinut, Nunalerinermullu Naalakkersuisoq)

Siumumiit nuannaarutigaarput Kalaallit Nunatsinni aningaasarsiornermut killeqarfimmi, imaani avatangiisinik allanngutsaaliuinissaq pillugu inatsimmut tapersiinissamut siunnersuummut.

Nunatta imartarujussuani angallanneq umiarsuartigut ukiut kingullerni annertuseriarpoq, qularnanngilarlu ukiut tulliini aamma annertunerujussuarmik akulikinnerusumillu imartatsinni angallanneq ingerlanneqalissasoq. Tamanna aamma annertuumik mingutsitsisoqarsinnaanerata aarlerinarneranik kinguneqartussaavoq. Tamannalu illuatungilerniarlugu inatsisitigut upalungaarsimaneq isumannaatsumillu aamma atortorissaarutigut aqqissuussineq piumasaqarnerlu tunngavissinneqarnissaa pisariaqarpoq.

Inatsisip atuutilerneratigut kingornalu nalunaarutit malitsigisassaasa atuutilernerisigut, angallatit uulianik imaarsisarnerinut tunngasut, eqqakkanut tunngasut, nalunaarutiginninnerit assartuinernullu attuumasortai pillugit nunat tamalaat inatsisaannut naapertuuttunik, nunatsinniillu nunat tamalaat peqatigalugit suleqatigiinnikkut nalunaarutit suliarineqassapput.

Siumumi nunatta pingaartumillu imartatta mingutsaaliornissaanut avatangiisitalu pitsaasumik innarlitsaaliornissaanut pingaartitsilluinnaratta, aammalu aalisarnikkut imartarujussuarput inuussutissarsiutigilluaratsigu, tamatigullu mingutsinneqannginnissaa pingaartillugu, iluarisimaarparput inatsisimut tapersiissutissami imarisaalu naammassineqassappat.

Taamatut oqaaseqarluta, innersuussutigissavarput, ataatsimiititaliami susassaqartumi suliarineqarnissaa.

Knud Kristiansen
Siumut